

FA'OMASIDA LOWALANGI BA AWÖDA NIHA

Luka 10:25-37

Famobörö

Hadia dandra niha sangomasi'ö Lowalangi? Ifa'ema Yohane imane niha sangomasi'ö Lowalangi ya'ia da'ö niha sangomasi'ö talifusönia. Hiza, ba wangomasi'öda Lowalangi he göi awöda niha (talifusöda), mufalua ia molo'ö somasi Lowalangi. Ba huhuo Yesu khö zangila amakhoita andre, ifa'ema khöda Luka hewisa ia wangomasi'ö Lowalangi he göi awöda niha.

Famotokhi

Si föföna, Fa'omasida Lowalangi zi tobali danedane lala wa'aurida. Huhuo andre ifobörö sangila amakhoita, ba wanofu khö Yesu hewisa wanöndra fa'auri si lö aetu. Isofu da'ö tenga börö me lö aboto ba dödönia hadia zi no musura ba Zura Ni'amoni'ö. Hiza, ohitönia ya'ia da'ö ba wanandraigö (*mencobai*) Yesu. Itandraigö Yesu hadia l'ila itema ma zui so wamahaö si lö fagöna soroi khö Yesu si tobali ndrelara ba wolaugö Yesu. Si ndruhunia, ohitö zangila amakhoita andrö ba lö sökhi. Ya'ia no tobali samahaö niha sato. Lö zi lö aboto ba dödönia hadia nisofunia andrö khö Yesu.

Aboto göi ba dödö Yesu hadia gohitönia. Andrö itema linia Yesu, "Hadia ba zura goraisa andrö? Hewisa wombassou?" Sangila amakhoita ya'ia niha sangila huku ma amakhoita Yehowa. Lö zi lö ibaso hadia nisura ba zura goraisa. Ba ifaduhu'ö da'ö ba wanemania li Yesu, wa nisura ba zura ya'ia da'ö wangomasi'ö Lowalangi ba awöda niha (27). Hiza, su'a wangomasi'öda Lowalangi ya'ia da'ö "moroi si'aikö" ba dödö, awö gera'era ba fa'abölö. Su'a wangomasi'öda sahatö khöda ya'ia da'ö "si mane fa'omasiau ndra'ugö".

Ba wangomasi'öda Lowalangi muhorigö fefu hadia ia (*totalitas*). Tödöda khö-Nia tahonogöi, era'era ba daroma li-Nia mo'ahonoa, fa'abölöda ta'oguna'ö ba wanuno Ya'ia, ba fa'aurida mowaöwaö ba zi faudu ba zomasi Lowalangi. Fa'omasida khö-Nia ba oroma na so khöda wolo'ö ba zi no ifakhoi ya'ita ba anehe zi fasui ya'ita.

Si dua, Fa'omasida mufaduhu'ö ba wangomasi'öda awöda niha (28-29). Atulö sibai niwa'ö zangila amakhoita wa ta'omasi'ö Lowalangi ba ta'omasi'ö göi nawöda niha. Hiza, aboto ba dödönia wa mo'amböta ia wamalua fa'omasi andrö, töratöra ba zanandrösa ba nawönia niha. Andrö ifuli isofu, ilau fabu'a khö Yesu, imane "Ba ha niha zahatö (*sesama*) khögu?" Fawu'asania andre tobali tandra khöda wa niha si lö molo'ö, ba asese manö fawu'awu'a.

Ba wanema da'ö, ba ibe'e gamaedola Yesu, niha Samaria sanolo niha nirabu si möi ba Yerikho. Si ndruhunia, so lala si lö nihaniha ba gotalua Yeruzalema-Yerikho. Lala ba da'ö ba manue sibai (*curam berbatu*), ba so dögi (*gua*) si tobali naha wamani'ö niha ba worabu sanörö. Ba tehöngö göi wa ba lala da'ö asese labunu niha. Andrö lafotöi ia "*Jalan Darah*." Ba da'ö itörö niha nirabu andre.

Ba gamaedola da'ö, sedöna ifa'ema khöda Yesu ya'ia da'ö buabua niha sanörö ba sanolo niha nirabu andre. Darua zanörö si föföna sibai, ya'ia gere ba ono Lewi. Me la'ila

niha nirabu andre, ba lö latolo ma'ifu. Hana? So 3 (tölu) faosatö: a) Marase: Ere faoma Lewi mohalöwö ba nomo Lowalangi. Lö sa'ae fa'abölöra ba wanolo; b) Folaugö: Ata'u ira na folaugöra zalua andrö. I'osimate ia ba lala, ena'ö latolo ia, ba aefa da'ö lahurufai dania sato ba worabu sanolo ya'ia; c) Famoni: Tebai lawawaya niha si no mate, molo'ö ba goroisa ena'ö böi ra'iö ira. Hiza, ere faoma ono Lewi andrö ba larorogö sibai wangamoni'ö ba lö khöra tödö sangomasi'ö awöra niha.

Sanörö aefa zi darua andrö, ya'ia Dawa Samaria. Dawa Zamaria ya'ia da'ö nga'ötö zi fulu mado, si fabali moroi ba Yeruzalema. Ya'ira andre no faruka ba niha baero ba ginötö Ndrawa Asuri, samaruka niha ni'olo'öra ba mbanua zo banua. Börö da'ö wa la'osiwawöi ira niha Yehuda si so ba Yerusalem. Ba dödöra, Dawa Zamaria andre tobali sa'ae ösi narako, si ra'iö ba si tebai latolo. Hiza, ifa'ema khöda Yesu, me i'ila nirabu andrö, ba "ahakhö dödönia." Ifalua wa'omasi, irege ifasao ba nomo ba zi mörö zikoli, ba ibu'a göi na sa mböli zoguna. Dawa Zamaria andre, ifahaö ita ena'ö ba wa'ahakhö dödö ba wangomasi'ö awöda niha, ba tabelegö föna wa'omasida, ta'oro'ö dangada ba wanolo, ba tafaosa haratoda ba wame'e lala. Lö ifaigi mbosi (*status*) ma ha niha nitolonia. Hewa'ae la'osiwawöi ia niha Yehuda, ba itolo, irorogö irege abölö. Eluahania khöda, fa'omasi andrö ba tebai mube'e goto'oto: ha ba niha sangomasi'ö ya'o, sahatö sibai khögu, ba tanö bö'önia. Fefu niha niwöwöi Lowalangi, ta'omasi'ö, töratöra niha si fa'udu khöda (Mat. 5:4).

Si tölu, Fa'omasi andrö tenga ha huhuo, mufaluagö. Imane Yesu ba zangila amakhoita "O'ö da'ö ba auri ndra'ugö" (28); "Ba ae'e, ba lau zi manö, ya'ugö göi" (37). Faudu ba da'ö imane Yohane "He ya'ami iraono! Böi ba li ta'omasi'ö nawöda, ba böi ba lela, ba nilauda khönia ta'omasi'ö ita, ba si ndrühundruhu" (1 Yoh. 3:18). Lö guna asoso ba högöda daroma li samarou ya'ita ba wangomasi'ö awöda niha, na fatiu dödöda ba na lö aolo ita wanolo niha. Tafalua wa'omasi, me no sa'ae oföna tatema wa'omasi Lowalangi.

Amarahuta

Ba huhuo Yesu andre khö zangila amakhoita, ba ifahaö ita ena'ö tafatoutou ba dödöda hadia no tobali ita sahatö ba nawöda niha (*apakah kita sudah menjadi sesama bagi orang lain*)? Hadia no tafalua wa'omasi? Hadia ha ba li manö ta'ila nifotöi fa'omasi? Ya itolo ita Lowalangi!

- Soli Deo Gloria.

[Pdt. Mey Daman Lawolo]